



**N**icolaus ex illustri familia comitum à Solms natus fuit. Is in omnis generis uirtutibus educatus in uirum maximum euasit. erat enim magna corporis & animi fortitudine conspicuus. Vnde Cæsarum castra secutus, prima militiæ rudimenta sub Maximiliano Cæsare posuit, cum is Venetos bello peteret. Postea uero magnam militiæ laudē adeptus, Papiæ ordines duxit, & 1525 prælio, in quo rex Franciscus caperetur, interfuit, atq; multæ suæ uirtutis documenta edidit. Pari ratione Nicolaus Viennæ in obsidione Turcica anno 1529 fuit, atq; cū alijs patriam Germaniam omni metu liberauit. Itaq; Carolus Cæsar eius uirtute motus eum in suum or-

dinem recepit, & aurei uelleris equitem constituit. Postea quoq; Ferdināus rex hunc Nicolaum 1541 ad Turcam legatū misit, et res maximas eius auspicijs impetrauit. Erat enim prudētia mirabili cum rara facundia conspicuus. Vnde res sibi belli & pacis tēpore commissas summa dexteritate expediuit, atq; hac ratione passim Germaniæ patrię inseruiens, magnam apud principes auctoritatem nactus fuit, ut merito huius Herois exemplo nobilitas Germaniæ omnem operam ad reipub. Christianæ utilitatem dirigere debeant. P. Iouius.